



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTA 0027613 26

Sarajevo, 16.03.2026. godine

Na temelju člana 35. stav 2. tačka e), te člana 216. stav 3. Zakona o kaznenom postupku Bosne i Hercegovine, donosim

NAREDBU
O NEPROVOĐENJU ISTRAGE

U vezi mail-a pod nazivom „Prijava ratnog zločina i govora mržnje na društvenim mrežama“, poslatog sa mail adrese ... na zvaničnu mail adresu Tužiteljstva, dana ... 2025. godine, i u prilogu dostavljenog „screenshot“-a komentara na društvenoj mreži „Facebook“, te eventualnog počinjenja kaznenog djela „Izazivanje nacionalne, rasne i vjerske mržnje, razdora i netrpeljivosti“ iz člana 145a. Kaznenog zakona BiH, iz razloga što je iz prijave i pratećih spisa očigledno da prijavljeno djelo nije kazneno djelo.

O B R A Z L O Ž E N J E

Tužiteljstvo Bosne i Hercegovine je, dana ...2025. godine, na zvaničnu mail adresu Tužiteljstva „info@tuzilastvobih.gov.ba“, zaprimilo mail pod nazivom „Prijava ratnog zločina i govora mržnje na društvenim mrežama“, poslat sa mail adrese, u kojem je kao prilog dostavljen „screenshot“ komentara na društvenoj mreži „Facebook“, sadržaja: „Drugaro moja, ja sam vise u JNA vozio tenk po Bosni nego ti putnicki, a najiskrenije sam bio po Podrinju i Srebrenici, Vukovaru i Ovcari, ne mogu da pisem ovde, imam sva dokumenta BiH kao ti pa se nadam da ce mo se videti, a to sto zelis 50, ja sam bagerom zivih zatrpao moj Bosnjo, eto najiskrenije“, ostavljen od strane korisnika „Facebook“ profila, te „screenshot“ komentara sadržaja: „Slava Rusiji bog vas cuvao svake sekunde i blagoslov vam dao braco“, ostavljen od strane korisnika „Facebook“ profila pod nazivom ...

U zaprimljenom mail-u je navedeno da iz komentara „Facebook“ korisnika ... proističe priznanje učešća u ratnim zločinima i genocidu u Srebrenici, masakrima u Vukovaru i Ovcari, kao i ubijanju i zatrpavanju živih ljudi, ističući da navedeno predstavlja kršenje međunarodnog

humanitarnog prava i osnovnih normi čovječnosti. Istovremeno, podnositelj prijave je naveo da se u komentaru „Facebook“ korisnika ... ogleda podrška ratnim zločinima i zločincima te podstiče govor mržnje.

Nakon analize sadržaja prijavljenih komentara, ostavljenih na društvenoj mreži „Facebook“, Tužiteljstvo Bosne i Hercegovine cijeni da se istima ne ostvaruju bitna obilježja kaznenog djela „Izazivanje nacionalne, rasne i vjerske mržnje, razdora i netrpeljivosti“ iz člana 145a. Kaznenog zakona BiH.

Detaljnije, komentar „Drugaro moja, ja sam vise u JNA vozio tenk po Bosni nego ti putnicki, a najiskrenije sam bio po Podrinju i Srebrenici, Vukovaru i Ovcari, ne mogu da pisem ovde, imam sva dokumenta BiH kao ti pa se nadam da ce mo se videti, a to sto zelis 50, ja sam bagerom zivih zatrpao moj Bosnjo, eto najiskrenije“, iako moralno i društveno spornog sadržaja, ne predstavlja širenje govora mržnje, kako je to navedeno u predmetnoj prijavi, što bi upućivalo na član 145a. stav 1. Kaznenog zakona BiH, jer komentar ne sadrži elemente javnog izazivanja ili raspirivanja rasne ili vjerske mržnje, razdora ili netrpeljivosti među konstitutivnim narodima i ostalima, kao i drugima koji žive ili borave u Bosni i Hercegovini, kao što ne predstavlja ni, u prijavi navedeno veličanje zločina, aludirajući na član 145a. stav 6. Kaznenog zakona BiH, odnosno, navedenim komentarom se ne dodjeljuje priznanje, nagrada, spomenica, bilo kakav podsjetnik ili bilo kakva privilegija ili slično licu osuđenom pravosnažnom presudom za genocid, zločin protiv čovječnosti ili ratni zločin, niti se imenuje javni objekat kao što je ulica, trg, park, most, institucija, ustanova, opština ili grad, naselje i naseljeno mjesto, ili slično, niti registruje naziv po ili prema licu osuđenom pravosnažnom presudom za genocid, zločin protiv čovječnosti ili ratni zločin, niti se na bilo koji način veliča lice osuđeno pravosnažnom presudom za genocid, zločin protiv čovječnosti ili ratni zločin.

U pogledu drugog prijavljenog komentara, sadržaja „Slava Rusiji, Bog vas čuvao svake sekunde i blagoslov vam dao braćo“, za koji podnositelj smatra da predstavlja podršku ratnim zločinima i zločincima i da podstiče na govor mržnje, Tužiteljstvo smatra da isti ne sadrži elemente koji bi ukazivali na poticanje ili raspirivanje nacionalne, rasne ili vjerske mržnje, razdora ili netrpeljivosti, niti pozivanje na nasilje ili mržnju prema grupi ili članu grupe ljudi određene prema rasi, boji kože, vjeroispovijesti, porijeklu ili nacionalnoj odnosno etničkoj pripadnosti. Naime, iz sadržaja komentara proizlazi da „Facebook“ korisnik ... ne pruža podršku ratnim zločinima i zločincima, niti ima za cilj da istim potakne na mržnju ili nasilja. Njena izava bi se mogla tumačiti kao lični stav u odnosu na drugu državu, u ovom slučaju Rusiju, bez referisanja na bilo koji narod ili grupu u Bosni i Hercegovini. Nadalje, davanje podrške Rusiji, samo po sebi, nije usmjereno protiv bilo kojeg od tri konstitutivna naroda u Bosni i Hercegovini (Bošnjaka, Hrvata i Srba), niti protiv ostalih naroda i građana Bosne i Hercegovine, te kao takvo ne utiče na međusobne odnose između navedenih naroda niti predstavlja radnju kojom bi se poticala ili raspirivala mržnja, razdor ili netrpeljivost među njima.

Shodno navedenom, nakon analize sadržaja prijavljenih komentara, te razmatranja mogućnosti postojanja elemenata bića kaznenog djela propisanog članom 145a. Kaznenog zakona BiH, Tužiteljstvo Bosne i Hercegovine je, na temelju člana 216. stav 3. Zakona o

kaznenom postupku BiH, iz razloga jer je iz prijave i pratećih spisa očigledno da prijavljeno djelo nije kazneno djelo, donijelo Naredbu o neprovođenju istrage.

Sukladno članu 216. stav 4. Zakona o kaznenom postupku BiH, Tužiteljstvo Bosne i Hercegovine će u Zakonom propisanom roku obavijestiti podnosioca prijave o donošenju ove Naredbe i o mogućnosti ulaganja pritužbe protiv iste Uredu tužitelja, u roku od 8 (osam) dana od dana zaprimanja Obavijesti.

**TUŽITELJSTVO/TUŽILAŠTVO BiH
TUŽITELJ**